

THE
JOURNAL
OF
THE
ROYAL ANTHROPOLOGICAL INSTITUTE

1907

欽定平定陝甘新疆回匪方略卷一百九 乙丑年

七月初二日 甲子 都興阿穆圖善奏言 臣 都興阿

自上年冬閒渡河以來由寶豐節節南剿直薄甯夏郡城因賊衆兵單未能及時攻拔刻下正在分營圍剿嚴密布置忽接翁同書飛函報稱雷正綰於初七日攻打金積堡失利由惠安堡退至韋州所部零落不成隊伍軍裝火藥器械

馬匹均爲賊有曹克忠不知退在何處魏添應
一軍亦退至姬家圈賊勢鷗張現在橫城花馬
池安邊一帶人心惶惶臣查甯靈踞逆勾結固
原賊匪分股四出牽掣官軍兵力過單不敷分
布方冀雷正綰一軍北來會合攻勦分牽賊勢
力拔堅城不意該軍接仗失利賊勢更熾儻逆
匪東竄我軍後路更行喫緊鹽固新復地方亦

將震動關繫大局實非淺鮮體察刻下情形亟
宜抽撥重兵回援後路則雷正綰等軍亦可藉
資整頓以圖再舉臣現飭都司李大楷星夜前
赴韋州等處查探雷正綰軍情嚴飭翁同書督
飭各軍妥慎防範趕催糧米接濟兵食一面將
前敵各營重加布置期于戰守得力俟探實雷
正綰情形卽當酌撥重兵相機援剿奏入

上命軍機大臣傳諭都興阿穆圖善雷正綰楊岳斌德勒克多爾濟劉蓉王榕吉曰雷正綰自進剿靈州後久未見其奏報茲覽都興阿等所奏該軍於初七日攻打金積堡失利由惠安堡退至韋州所部零落不成隊伍曹克忠不知退在何處魏添應一軍亦退至姬家圈地方是該軍此次挫敗情形甚重賊勢益肆鷗張甯靈回匪皆將狡焉思逞而都興阿等後路花

定一帶尤爲可慮都興阿現派都司李大楷前赴章
州查探雷正綰等軍情著卽將甯郡前敵各營一面
布置穩慎一面迅速抽撥重兵回援後路與雷正綰
等軍相機援剿毋稍遲誤雷正綰趕將所部潰勇設
法招集力圖整頓剋期再舉該署提督素稱善戰軍
律尙嚴何以敗衄至此難保非爲該回求撫所誤此
後當妥爲防範萬不可輕爲議撫致墮狡謀甘肅軍

情日緊楊岳斌何以仍無抵省信息實屬延緩著該督趕緊馳赴省城與都興阿雷正綰等咨商調度迅籌策應毋誤事機其金積堡失利情形及曹克忠現在何處並著雷正綰迅卽馳奏橫城花馬池定邊一帶人心惶惶該處兵力本不甚厚此時賊勢更熾若再乘勢東竄勢必掣動全局著都興阿嚴飭翁同書督率各軍加意嚴防遇賊卽擊劉蓉仍飭駐防定靖

一帶之同知鄢太愚等軍會同甘省防軍扼要堵剿
毋稍疏虞山西邊外防務亦關緊要德勒克多爾濟
王榕吉務當會商妥籌將綏遠城等處防兵嚴密布
置毋得臨渴掘井致滋蔓延

初四日
丙寅明緒奏言接據探報巴燕岱城池被

回匪攻破闔城文武官員均被慘害領隊大臣
穆克登額全家殉難其逃出馬隊兵丁八百餘

名中途被匪截殺殆盡又據鎮迪道文麟報稱
二月初九日賊攻古城將滿城西北城垣轟陷
現已失守各等語臣株守彈丸兵單餉絀未能
分軍策應焦急殊深惟有仰懇

天恩催令大兵迅卽出關分路截擊以遏賊氛至塔爾
巴哈台數月以來文報不通昨據探報正月初
一日該城回匪變亂安集延哈薩克隨同賊匪

攻城臣現已派委領隊大臣布爾和德前往庫爾喀拉烏蘇等處調集土爾扈特官兵一千五百名並調塔城之察哈爾額魯特官兵一千名迅卽馳赴塔城會同武隆阿圖庫爾合力剿賊以解城圍

明緒又奏言新疆回匪滋事南路各城均爲賊阻久無音耗北路各城自上年烏垣滿城失守

伊犁以東庫爾喀喇烏蘇等城相繼淪陷精河
迤東一帶地方無不受其蹂躪本年正月閒塔
爾巴哈台回匪又復變亂伊犁三面受敵竟成
孤立精河距伊僅三百餘里向爲東路孔道賊
匪屢經窺伺設使再有疏虞則伊犁藩籬盡撤
內戰外防愈難措手當經札飭烏魯木齊委署
章京錫拉春等選募民遣各勇酌帶軍火糧石

馳赴布爾噶齊軍臺擇要紮營相機進剿旋據
錫拉春等稟稱回匪由庫爾喀喇烏蘇東竄官
軍節節進紮當將庫城收復移營東進於四月
初七日行至距安集海三十餘里之樹窩頭地
方突遇賊匪數千名分股來撲勢甚猖獗當卽
整隊迎敵賊匪施放槍礮我兵奮力攻擊千總
馮吉鰲親冒矢石撲入賊隊殺傷甚衆錫拉春

等率領兵勇一擁向前賊匪登時敗亂追殺三十餘里踏毀賊營三座陣斬逆首二名賊匪數百名奪獲軍械駝隻不計其數旋由安集海一帶沿途攻勦直抵烏蘭烏蘇軍臺探知前途賊勢甚重卽在軍臺迤北安營四月十九至二十一日賊匪疊來撲犯我兵整隊迎敵斬殺甚多賊始敗遁

臣

查此次官軍奮勇爭先連獲勝

仗所有在事出力員弁兵勇懇

恩優加獎敘以示鼓勵臣現飭該員弁等統帶得勝兵

勇進規綏來縣城以期迅殄賊氛

明緒又奏言四月十三日突有回匪數萬人糾

合哈薩克由東南北三路攻撲伊犁城垣臣當

派額騰額等分隊禦敵該匪蜂擁而至我兵奮

勇衝擊賊勢不支紛紛敗竄官軍乘勝追殺殪

賊甚多二十日回匪又分三路前來直撲城下
我軍出隊迎戰該匪分股由山根潛繞我兵之
後直撲北門我軍腹背受敵幾不能支幸臣先

期已將槍手四百名暗伏北門迤東當卽列隊
前進連環攻擊旋經崇熙等帶領馬隊接應併
力夾攻回匪始行敗竄立解城圍我兵追至水
泉地方殺賊數百名三十日回匪又復撲城亦

被我兵擊退殲斃多名五月初三日該匪圍攻綏定城當派佐領圖山布等帶領馬隊前往接應滿營兵丁博清額臨陣退縮當卽斬梟示衆官弁兵勇遂各爭先效命拚死攻擊將賊匪殺斃數百名陣斬紅衣首逆一名賊始敗退初六初七等日該匪於夜閒暗襲綏定佐領烏勒德春率同兵勇撲入賊隊斬殺二千餘名逆衆大